

## ИККИНЧИ БЎЛИМ

### ЎЗБЕКИСТОН РЕСПУБЛИКАСИ ПРЕЗИДЕНТИНИНГ ҚАРОРИ

#### **487** Таълим муассасаларини реконструкция қилиш, мукаммал таъмирлаш ва жиҳозлаш жамғармасини Таълим ва тиббиёт муассасаларини реконструкция қилиш, мукаммал таъмирлаш ва жиҳозлаш жамғармаси этиб қайта ташкил қилиш тўғрисида

Замонавий талаблар ва халқаро стандартларни ҳисобга олган ҳолда республика таълим ва тиббиёт муассасаларининг моддий-техника базасини тизимли асосда ривожлантириш ҳамда мустаҳкамлаш, уларни энг илғор ўқув, ташхис ва даволаш ускуналари, ахборот-компьютер техникаси билан жиҳозлаш, бунинг учун жамланадиган бюджетдан ташқари ва грант маблағларидан ўринли ҳамда самарали фойдаланиш мақсадида:

1. Ўзбекистон Республикаси Молия вазирлиги, Иқтисодиёт вазирлиги, Олий ва ўрта махсус таълим вазирлиги, Халқ таълими вазирлиги ҳамда Соғлиқни сақлаш вазирлигининг 2012 йил 1 январидан бошлаб Ўзбекистон Республикаси Молия вазирлиги ҳузуридаги бюджетдан ташқари Таълим муассасаларини реконструкция қилиш, мукаммал таъмирлаш ва жиҳозлаш жамғармасини Ўзбекистон Республикаси Молия вазирлиги ҳузуридаги бюджетдан ташқари Таълим ва тиббиёт муассасаларини реконструкция қилиш, мукаммал таъмирлаш ва жиҳозлаш жамғармаси этиб қайта ташкил қилиш тўғрисидаги таклифи қабул қилинсин.

2. Ўзбекистон Республикаси Президентининг 2010 йил 10 ноябрдаги ПҚ-1432-сонли қарорида аввал белгиланган вазифалар билан бир қаторда бюджетдан ташқари Таълим ва тиббиёт муассасаларини реконструкция қилиш, мукаммал таъмирлаш ва жиҳозлаш жамғармасининг асосий вазифалари этиб қўйидагилар белгилансин:

тасдиқланган манзилли дастурларга мувофиқ соғлиқни сақлаш муассасаларини куриш, реконструкция қилиш ва мукаммал таъмирлаш бўйича ишларни молиялаштириш;

замонавий талаблар ва белгиланган нормативлардан келиб чиққан ҳолда тиббиёт муассасаларини энг янги лаборатория, ташхис ва даволаш ускуналари, компьютер техникаси ҳамда бошқа тиббиёт аппаратлари, махсус мебель ва анжомлар билан жиҳозлаш ҳамда доимий асосда тизимли қайта жиҳозлашни молиялаштириш.

3. Белгилаб қўйилсинки, қайта ташкил этилаётган бюджетдан ташқари Таълим муассасаларини реконструкция қилиш, мукаммал таъмирлаш ва

жихозлаш жамғармасининг барча активлари ва пассивлари 2012 йилнинг 1 январидан бошлаб Ўзбекистон Республикаси Молия вазирлиги ҳузуридаги бюджетдан ташқари Таълим ва тиббиёт муассасаларини реконструкция қилиш, мукамал таъмирлаш ва жихозлаш жамғармасига топширилади.

4. Қуйидагилар Жамғарманинг даромадларини шакллантириш манбалари этиб белгилансин:

хўжалик юритувчи субъектлар томонидан Жамғармага қонун ҳужжатларида белгиланган тартибда мажбурий ажратмаларни тўлашдан тушадиган маблағлар;

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг бюджетдан ташқари маблағлари;

халқаро молия институтлари ҳамда бошқа хорижий донорларнинг имтиёзли кредитлари (қарзлари) ва грантлари;

соғлиқни сақлаш соҳаси ва марказлаштирилган инвестициялар харажатлари ҳисобига алоҳида бўлим билан ажратиладиган Ўзбекистон Республикаси Давлат бюджети маблағлари;

хайрия қилувчилар — юридик ва жисмоний шахслар, шу жумладан Ўзбекистон Республикаси норезидентларининг маблағлари;

Жамғарманинг вақтинча бўш маблағларини жойлаштиришдан олинadиган даромадлар ва қонун ҳужжатларида тақиқланмаган бошқа тушумлар.

5. Қуйидагилар:

Таълим ва тиббиёт муассасаларини реконструкция қилиш, мукамал таъмирлаш ва жихозлаш жамғармасини бошқариш бўйича Кенгаш таркиби 1-иловага\* мувофиқ;

Ўзбекистон Республикаси Молия вазирлиги марказий аппаратининг бошқарув ходимлари сони доирасида, Ўзбекистон Республикаси Молия вазирлигининг марказий аппарати таркибида бошқарув ходимлари сони 9 нафардан иборат Жамғарма Ижроия дирекциясининг тузилмаси 2-иловага\*\* мувофиқ тасдиқлансин.

6. Ўзбекистон Республикаси Соғлиқни сақлаш вазирлиги тузилмасининг марказий аппаратида бошқарув ходимлари сони 3 нафардан иборат тиббиёт муассасаларини қуриш, мукамал таъмирлаш ва жихозлаш (тўлиқ жихозлаш) манзилли рўйхатларини шакллантириш ва мониторинг қилиш бўйича гуруҳ ҳамда Қорақалпоғистон Республикаси Соғлиқни сақлаш вазирлиги, вилоятлар ва Тошкент шаҳар соғлиқни сақлаш бошқармаларида белгиланган бошқарув ходимлари умумий сони доирасида 2 нафар ходимдан иборат тегишли шўъбалар ташкил қилинсин.

7. Шундай тартиб ўрнатилсинки, унга мувофиқ:

Ўзбекистон Республикаси Соғлиқни сақлаш вазирлиги Қорақалпоғистон Республикаси Вазирлар Кенгашининг, вилоятлар ва Тошкент шаҳар ҳокимликларининг иштирокида ҳар йили ҳудудлар бўйича тиббиёт муассасаларини қуриш, реконструкция қилиш, мукамал таъмирлашга оид таклифларни

\* 1-илова берилмайди.

\*\* 2-илова рус тилидаги матнда берилган.

шакллантиради ҳамда Ўзбекистон Республикасининг Инвестиция дастури-ни тасдиқлаш учун белгиланган муддатдан уч ой олдин мана шу таклиф-ларни Ўзбекистон Республикаси Иқтисодиёт вазирлигига киритади;

Ўзбекистон Республикаси Молия вазирлиги Жамғармага келиб тушадиган маблағлар доирасида Иқтисодиёт вазирлиги билан биргаликда Тиббиёт муассасаларини қуриш, реконструкция қилиш, мукамал таъмирлаш Дастурининг узил-кесил параметрларини шакллантиради ҳамда уни Ўзбекистон Республикаси Давлат бюджетининг лойиҳаси киритиладиган муддатларда Вазирлар Маҳкамасига тақдим этади;

Тиббиёт муассасаларини қуриш, реконструкция қилиш, мукамал таъмирлаш Дастури ҳар йили тасдиқланадиган Инвестиция дастурига мустақил бўлим сифатида киритилади.

#### 8. Қўйидагилар:

маҳаллий бюджетлар ҳисобидан таъминланадиган соғлиқни сақлаш муассасаларини қуриш, реконструкция қилиш ва мукамал таъмирлаш бўйича буюртмачи вазифаси Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари ҳузуридаги ягона буюртмачи хизмати зиммасига, республика бюджети маблағлари ҳисобидан таъминланадиганлари эса, Ўзбекистон Республикаси Соғлиқни сақлаш вазирлигининг қурилиш бўйича Бирлашган дирекцияси зиммасига;

тиббиёт муассасаларини жиҳозлаш (тўлиқ жиҳозлаш) бўйича буюртмачи вазифаси, берилган ваколатлар доирасида, Ўзбекистон Республикаси Соғлиқни сақлаш вазирлиги зиммасига юклансин.

9. Ўзбекистон Республикаси Молия вазирлиги манфаатдор вазирликлар ва идоралар билан ҳамкорликда бир ой муддатда Ўзбекистон Республикаси Вазирлар Маҳкамасига:

Ўзбекистон Республикаси Молия вазирлиги ҳузуридаги Таълим ва тиббиёт муассасаларини реконструкция қилиш, мукамал таъмирлаш ва жиҳозлаш жамғармасининг 2012 йилги даромадлари ва харажатларининг янгиланган параметрларини, шунингдек тиббиёт муассасаларини қуриш, реконструкция қилиш ва мукамал таъмирлашнинг 2012 йилги Дастурини;

қонун ҳужжатларига мазкур қарордан келиб чиқадиган ўзгартиш ва қўшимчалар тўғрисидаги таклифларни киритсин.

10. Мазкур қарорнинг ижросини назорат қилиш Ўзбекистон Республикасининг Бош вазири Ш.М. Мирзиёев зиммасига юклансин.

**Ўзбекистон Республикаси**

**Президенти**

**И. КАРИМОВ**

Тошкент ш.,  
2011 йил 21 ноябрь,  
ПҚ-1645-сон